

La Pimpa par furlan ae mostre che e fâs fieste pai 50 agns de cjiçute a balins

Domenie ai 16 di Novembar, la ARLeF e dediche un laboratori speciâl
ai fruts dai 3 ai 6 agns.

In mostre, un panel al conte la storie de
"Pimpa par furlan" tra editorie e tv.

Tra lis tantis lenghis dal mont che la Pimpa e fevele al è il furlan e al è propit *par furlan* che la innomenade cjiçute di Altan si prepare a zuiâ cui plui piçui. **Domenie ai 16 di Novembar, aes 10.30**, tai spazis de mostre "Bon complean Pimpa" - te ex glesie di Sant Francesc (vie Beato Odorico da Pordenone), a Udin - si fasarà un **laboratori** speciâl ideât e metût adun de ARLeF in colaborazion cul Comun di Udin, intitulât **"ARLeF e Maman a presentin la Pimpa par furlan. Zûcs, animazion e leturis in compagnie de simpatiche cjiçute blancje a balins ros"**. La ativitât e je dedicate in particolâr ai **fruts dai 3 ai 6 agns** che a vivaran tantis aventuris: si scomençarà cu la leture animade di "Pimpa e lis robis" par dopo zuiâ ducj insemi cul memory creât cun ogjets de sô cjasute plene di colôrs; si cjararà ancje un carton animât de Pimpa te version in lenghe furlane. Ae fin dal laboratori, ogni frute e ogni frut a varan in regâl un librut de Pimpa par furlan, publicât de ARLeF. **La prenotazion al laboratori e je obligatorie e par notâsi al è timp fin joibe ai 13 di Novembar, scrivint a info@sportelfurlan.eu**

Chê de cjiçute di Altan e je une storie lungje 50 agns. Une storie che si incrose ancje cu la lenghe furlane, come che al conte ben il panel dedicât ae "Pimpa par furlan" presint te mostre. In cheste maniere la ARLeF - Agenzie regionâl pe lenghe furlane e à volût evidenziâ il contribût dal furlan ae storie editoriâl e culturâl de cjiçute a balins. La Pimpa di fats e fevele in marilenghe intune golaine di cuatri libruts ilustrâts, disegnatîs di Altan e publicâts de ARLeF. I volums, pensâts pe prime alfabetizazion, a fasin jentrâ i plui piçui tal mont de cjiçute a balins midiant dai ogjets che si doprin ogni dì, dai colôrs, dai numars, de funzion des robis.

La Pimpa par furlan e je rivade ancje in television graciis ae RAI F-VJ, che e à produsût e trasmetût la version par furlan di tredis episodis, che dopo a son stâts metûts adun tal dvd "Pimpa par furlan" in grazie de colaborazion cu la ARLeF e la Region F-VJ.

Udin, ai 7 di Novembar dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<